





四明雅集序

明

明

余嘗聞之入國問俗陳詩觀風在昔則然往余守明爰  
吏治其風土人物多所覽睹至諸名家詩愷雖濩落亦嘗  
玩究一二明際海帶江環山滙湖土衍而澤秀蓋多博雅  
能文之士云詩源起自唐賀祕監在當時與李杜並馳已  
有聞矣逮宋及元間多才雋攻尚互異而篇什不傳

明興協氣攸鍾碩彥輩出倡雅中朝時則有鄭千之烏斯  
道者上矣繼之張金楊李陳陸諸賢後先凌競彬彬然以  
興雖其體裁或異而神理同原並取裁於盛唐而度衷於  
漢魏譬之球琳琬琰蒼琮弘璧同堂並列雖殊形異質要  
之萃精聚華均之為天下寶余嘗遊四明間與人論詩竊





原件短缺



謂西北之音慷慨東南之音柔婉柔婉者易入于悲慷慨者率流于猛律之以詩之正中恐未也乃今見斯集也裁剛柔之偏酌舒慘之節激不流猛婉不入悲諧中原之正聲而不囿于風氣之故信美且傳矣是集選於少叅南江戴公南江號博洽平居兀潔不輕許與况得沈子嘉則相與品評嘉則又才高穎敏故其所選甚精集中所載計五十五人帙分上下詩計若干首嗟夫代不數人人不數篇明斤斤止一郡人與詩並盛如此噫此明之所以重天下也集成南江以書謂愷子嘗刺吾明觀風采詩亦侯事也庸無言乎哉愷不敢以不文辭僭為之序

嘉靖三十六年丁巳春二月

賜進士出身大中大夫湖廣布政司右叅政致仕前知寧波府事雲間沈愷撰



四明雅集後序

明州自唐賀祕監以詩人風流聞而四明始重于天下嗣後雲蒸霧變異才間出初高士謝遺塵隱于明山之南雷嘗過吳中謂陸龜蒙曰吾山有峯最高四穴在峯上每天宇澄霽望之如戶牖故茲山名曰四明龜蒙與友人皮日休各賦詩九篇流傳於世炳炳如也維時有若韓文公送惠師詩發跡入四明梯空上秋旻少陵詩履穿四明雪謂憶鄭參軍云爾明之詩人萌芽秦漢鳴盛開元至宋元靡麗極矣及我

皇明廓清華夏貞元符會洪武中吾明詩派始變雅正成化以還蔚然人文咸追古作吾嘗得其詩家數十人張式



之王伯源謝廷蘭章文重金本清張白齋魏雲松共傑然  
者也風雅之體於是為備弘治以來乃有追逐晉遺唐音  
者其人往往以時並鳴於乎盛矣少司空李董山每歎鄉  
賢集稿漸逸安得如赤城方石先生為之詩選以定一鄉  
之論哉余因是慨想其人思欲搜訪遺集而不可得一日  
從芝山楊君見委鉅編曰四明雅集廼詩人宋弘之先已  
纂葺前人揆之古體尚有未協吾得沈嘉則學識比興奇  
士也乃與之品藻拔其沉渾峭特及近時諸作增其所未  
備總得六十人集成四卷傳諸其人口猶有祕書之風教  
也乎余不自量深惜鄉賢篇什謂其可以垂世而行遠也  
苟有好之者不惟吾明山之助其文獻亦有足徵者故僭  
為邦人道之

嘉靖三十五年丙辰秋八月吉明郡戴鯨謹序



皇朝四明風雅

卷之一目錄

鄭真

王敬中

桂彥良

錢安

袁圭

烏斯道

徐信欽

周禮

楊範

戴安仲

顧慤

陳敬宗

謝瑾

周冕

黃潤玉

陸瑜

周序

洪常

黃性

鄭自強

李本

李悌謙

王淮

潘瑛

王來

王總

章珍

張憬

詹復禮

嚴貞

汪綸

余謚

范瀚

桂庭珪

李澤

李玉



王節

齊政

裘鏞

袁士元

金湜

周普

周元佐

周祐

鄭惟廣

王鑰

戴浩

戴栗

洪性

毛弘

薛穰

盧瑀

范麟

皇朝四明風雅卷之一

士

晉

蕭

鄭真

字千之鄞人洪武四年解元終廣信教授

國

平陵東

王莽篡漢翟義起義兵莽殺義其門人作

歌以怨之

平陵東翟義死東海翻波冤莫洗漢賊已成漢鼎已傾在  
膝北面誰為臣嗟哉忠勇甘殺身撓捨光芒射天闕怒髮  
上指雙劍折碧草萋萋一泓血漢家神靈香空濛欲排閭  
闔訴黠聰吁嗟平陵東胡獨死義公

公無渡河

公無渡河公竟渡河吁嗟奈公何長風掀天濤浪急蛟龍  
垂涎待人食公乎渡河甘墜溺慟哭河水湄公乎不返將



安之憶妾嫁公時窈窕矢同歸如何中道乖百年負深期  
河流湯湯猝未乾妾欲見公良已難嗚呼命兮公所安公  
所安吾誰怨愁來祇把箜篌彈高聲淒切淚橫臆化身欲  
填精衛石河南深宮閼弗聞公乎渡河嗟莫及中心慘慘  
思惓惓請公來聽箜篌音相從願向重淵深公乎公乎知  
妾心

摇摇花 虞美人草也

摇摇花花開向天涯花摇摇花如金步嬌憶昔美人年正  
少青春共覩花容顏金釵聘入霸王宮嫣然一笑胭脂紅  
獨夫叱咤空四海恩寵唯憐一身在戲馬臺前宮闕深當  
筵歌舞娛君心君心荒兮霸業消淮南却望烏江遙漢兵  
十萬紛於蟻帳底美人淚如水八千軍散楚歌聲倉忙忍  
為君王死陰陵古道行人來傾城傾國真堪哀金劍霜飛  
一泓血天魂化作春花開花開花落流年改春秋浩蕩秋  
如海愁如海將奈何虞姬墓前烟草多花魂寂寞欲歸去  
杜宇夜啼三月暮

龍舟戲水曲

千里晴波汴河驚萬丈虹橋依樓閣龍船錦纜駕風來五  
色騰驤駭鯨鯨河伯深宮執玉朝鮫人震懾停織綃三千  
粉黛出歌舞星裙霞帔水飄飄大業官家擁鑾輅香爇沉  
檀藹烟霧吹簫擊鼓向中流倚空咲指江都路瓊花三月  
素書閒高臺照鏡憐容顏回首長安歸不得風濤洶湧愁



人間君不見舊日燕都誇海子五爪盤拏綵雲起天魔舞  
罷翠葉奔高柳斜陽映秋水

烏夜啼

淮海天高銀漢低古樹月明烏夜啼山人謾說烏頭白舊  
日秦庭遣燕客先生曷賦歸去來窮途戚戚胡為哉是時  
先生睡初熟夢裡聞呼哇首管起來暗憶故園棲著書每  
及烏啼時龍庭需材資黼黻姓名一旦登金閨江廣作官  
天萬里襟懷湛湛西江水明良盛世遇風雲欲把丹心報  
天子讒言貝錦無停梭烏聲吠月愁奈何挈家輸作池河  
住吁嗟歲月成蹉跎玉律清商奏中夜倥偬愁懷一輪寫  
却將心事問靈烏蕭蕭白髮當何如我聞烏啼有凶吉天

意悠悠真可識細聽枝上聲啞啞抱琴定向山中家山中  
仙人紫霞服步虛好聽烏啼曲消得門前五柳青風流祗  
似陶淵明任爾烏聲竟昏曉物我兩忘天地老

王敬中

鄞人洪武四年進士叅政

送友人赴廉州

烏府才華羨獨賢北風又上孝廉船篋書尚有陳琳檄行  
李都無子敬羶帆影曉分湘浦月珮聲晴拂隱山烟壯遊  
萬里須乘興好著聲名到日邊

桂彥良

以字行慈谿人洪武中春坊正字終長史

雙峯

平車晨過杜湖嶺喜見屹立之雙峯千里松風奏韶濩一



泓秋色潛蛟龍仙禽古樹集梵刹細草幽花迎竹筵齋餘  
晏坐山閣靜夜深隔屋聞疎鐘

和陶詩二首

蛟龍作雲雨蜉蝣出以陰小大各有適胡然愁予襟架插  
千卷書壁掛無絃琴希賢復希聖視古猶視今所貴生世  
間動止為人欽有琴莫厭彈有酒莫厭斟窮居見高節寡  
和乃希音誰能言嘯嘯強顏隨冠簪子雲媚新室立言徒  
艱深

神龍困淵壑野鶴凌空飛飛潛不同調一喜復一悲我生  
悟物理獨立恒無依飲酒得真趣讀書探指歸匪為究窮  
達亦復知榮衰前賢有遺則行行慎無違

錢安 郵人洪武中韓府紀善

泊梁湖堰

曹娥廟前雲霧積曹娥江上風雨急停舟五日猶未行舉  
酒問娥應不得憶昔十八初度江昨日年少今頭白開篷  
忽見江上山山色猶如舊時碧我思今日山中人地爐竹  
火齊促膝我家山中亦有廬嗟我胡為遠行役讀書求名  
乃身累廿年辛苦殫心力微祿何曾得養親到今負米公  
家喫夢來正欲抱衾卧破篷漏滴船中濕岸上敲門借酒  
家瑟瑟寒風吹四壁夜長輾轉不成寐幾度思家淚沾臆  
來遲又恐長官嗔西望吳山日東出

雨晴



秋風忽起捲重陰日色微茫照樹林野老扶藜看白石山  
人伐木度青岑門前溪水添三尺墻外竹梢高十尋明日  
甕頭春酒熟且依松下一開襟

袁圭字廷珪鄞人禮科給事中以字行

早朝敬奉令諭作

金闕曠曠曙色新天香浮動九重春共瞻龍袞臨丹宸齊  
造鷓班拜紫宸盛治遠符唐禮樂中興不數漢君臣華夷  
乂已歸王化樗朽猶承雨露恩

烏斯道字維善號春草齋慈谿人洪武中薦舉知縣

古詩七首

驅車陟太行中道車輪折挽舟溯河流中流縵縻絕前涂

鬱漫漫徬徨欲懷歸積雪被長坂洪濤蕩寒暄胡不戒未  
然閫中慎所之徒懷百年志自貽千里悲借令無頭躓豈  
念出門非且將詬徒御羸糧一何遲

女蘿依松栢松栢不可依巨榦遭翦伐脩蔓殄無遺女蘿  
當奈何無依乃其宜盤旋大化中春榮秋自萎升高豈不  
好夭折亦足悲

荆棘開好花娟娟耀芳辰羅生及周道未嘗罹斧斤斧斤  
或相加芒刺反傷人朔雪負其死后土固其根人力愧孱  
弱天地胡不仁崇崗有松栢日日摧為薪

中郎歎知己江夏殺所依愛憎生逆順良窳繆是非不憂  
漢室仆乃為董卓悲不憤奸雄術乃譴禰衡譏傷我英傑



士終為識者嗤

饑不食虎肉寢不處虎皮虎皮非不暖虎肉非不肥本受

惡氣生貌與正氣違奈何五行秀乃與惡相隨胡不觀鳳

鳥猶能慎羽儀朝選竹實食莫擇梧桐棲

螂蛆素甘帶鴟鴞喜食鼠蛇長即吞象蝟小能制虎鷹鷂

與鴛鴦生同被毛羽胡不念同類搏擊苦相侮鴛鴦好文

彩疇能愛憐汝

狝蘭畏陽盛甘菊懼蟲食昌陽惡溪涸揭車傷土瘠上有

寄生草蒙茸託松栢下有無名花紛披弄佳色尋芳邈無

人空有馨香德

題寒林遠岫圖

遊子念遠道歲晏不得歸出門見林薄日暮烟火稀關山

渺千里猿狖聲正悲况爾霜雪繁鳥道不可躋陽春固伊

邇奈此寒無衣衣寒何足歎所憂美人違

徐信欽

字授御史

號敬齋慈谿人洪武三十三年舉人教

塞坪古蹟

獨上龍臯絕頂遊自憐空泛五湖舟雲迷芳草烽烟息月

浸荒岡獵火收萬樹壓嵐凝越恨千年籠雨戴吳雙英雄

滿眼今消盡惟有長江午夜流

周禮

字吾學鄞人洪武三十三年應貢隱居不仕

五磊晴嵐

雨歇雲收山氣濃曉來遮遍翠芙蓉小童門外忽驚報失



却前村五石砧峯

九灣紅雨

桃花灣口錦雲開片片隨風逐浪來吹向前溪作紅雨却  
教劉阮問天台

秋水芙蓉

秋風隔岸木蓮開掩映紅粧玉鏡臺夜靜月明瓊佩響翠  
雲屏裡水仙來

斗室星臨

絳燭燒殘夜二更珮聲時雜步虛聲玉皇案下朝初罷星  
漢無雲斗柄橫

題白衣送酒圖

分田種秫釀新菟祗為無心見督郵若使白衣人不到  
花孤負一年秋

楊範

字九疇號栖雲鄞人封南京吏部侍郎

客夜

客館渾無寐况逢冬夜長月光侵楮帳霜氣逼藤牀不作  
三更夢空迴九曲腸家庭纔只尺安得壽瑤觴

水中月

水輪出海碧波恬光彩虛明上下兼鮫室秋清涵玉兔龍  
宮夜靜浴銀蟾天收雲幕淵沉璧風捲湘紋鏡啓奩未信  
江頭錦袍客欲將倒影手中拈

戴安仲

字仲莊鄞人洪武中薦授寧波府學訓導



秋日山庵

携琴入空林修竹翠相倚一曲千古心泠泠寄流水拂雲  
卧白石冥搜契玄理有時采薪人歌聲隔林起

顧慤

字存誠慈谿人永樂中薦舉任正字

次黃叅政漁樂生韻

溪頭黃雲晚不雨柳陰無人棹歌起芙蓉數朶溪上山蒲  
菊萬頃溪之水錦鱗玉尺揚文瀾暢飲誰識銀瓶乾歸來  
白月滿蓬戶夜深夢落磻溪灣

騮馬歌

熒惑宮中一團火踢倒祝融掣金鎖飛來塵世化頰虬滿  
背紅雲結花朶絳鬃拂膝朱尾長赤瑛絡胸紅絲纏炎光

閃閃照人熱渴死造父愁王良北平公子死庭簿萬錢  
金求赤兔黃羅抹首袴摺靴虎氣逼人如呂布江南書生  
力不多一躍五丈飛官河相看馬上失聲咲但見碧烟如  
鳥過電光拂眼騰朱梭駿快不數生蛟鼉研朱為寫紅叱  
撥喚起杜陵賡我歌

贈張鍊師歸鳴臯

寶匣龍章御勅開仙師辭闕返蓬萊鳳池劍影隨雲化鶴  
背松聲載月回火候不須調藥竈仙名今已著丹臺栢枝  
燒罷應多暇報我藍田長玉栽

題推篷圖

記得當年訪老逋扁舟載雪過西湖香浮水面涵清淺影



落篷窓半有無玉樹久驚春漏泄冰花相照月模糊誰將  
一段真消息收拾歸來作畫圖

陳敬宗

字光世慈谿人永樂二年進士南京祭酒

題出獵圖

胡天八月秋草黃朔風捲地沙茫茫胡人獸畜徒如馬首  
蒼鷹入層漢橫弓仰視雲中翮一胡下馬初解鞍啣草嚼  
鏃蹄四攢手持箭鏃審曲直目光如電神氣完嗟我爾胡  
意自適渴飲酪漿饑獸食叮嚀爾胡体犯邊萬古千年事  
中國

送楊進士歸南京

城闕鏗聲曙河山鴈影秋琴尊千里別冠珮兩京遊遠極  
連平野涼風送去舟懷君明月夜矯首鳳池頭

夜坐即景

翠竹當窓月照池焚香獨坐夜深時興來更掃門前雪閒  
看梅開第幾枝

同東里楊學士郊遊分韻得臺字

熙陽麗神甸鮮飈蕩浮埃采真造琳館抗蹟登銀臺桂柱  
產朱草洞門閉蒼苔况與塵世隔浩歌望蓬萊忽逢赤松  
子羽駕空中來咲扶綠玉杖遥勸紫霞杯寶訣為我授瑤  
笈為我開舉手復遠別悵望徒徘徊

題回文卷



年命能幾何歡愛恒不足結髮情未衰新人美如玉侈心  
移室家讒口傷骨肉秋風度蘭帷春光麗金屋鸞鳳愛雙  
翔鴛鴦憐獨宿誓將托錦機慙慙組心曲緘之惠遠方長  
途冀旋轂庭花為誰芳尊酒空自綠中饋幸見收敢怨罹  
斥逐君心如明月應諒無遺燭

元夕賜觀燈詩五首

皓月金門夜和風玉殿春雲移三島近燈簇萬花新天仗  
臨丹宸星橋接紫宸中官宣德意宴賞及群臣

紫禁疎鐘靜高城刻漏傳五雲迎寶蓋萬戶綴金蓮瓊醴  
行仙席龍盤進御筵教坊呈百戲齊過玉階前

劍佩清霄近峯巒翠閣重花明金殿月香度玉樓風拜舞

諸蕃集歡娛萬國同遥聞歌吹發五色度雲中

紫陌連清禁彤樓接絳河九門星彩動萬井月華多寶炬

通宵晃鸞笙協氣和臣民涵聖澤齊唱太平歌

山擁金鰲壯雲盤綵鳳來星河隨斗轉珠闕倚天開歡洽

春聲徧恩添淑景回頭歌魚藻詠長奉萬年杯

題吳興趙公畫馬

古來畫馬說韓幹神駿今數吳興公天機巧妙奪真造筆  
意所到精靈通曹君曾圖照夜白少陵昔詠玉花驄可憐  
人馬久不見忽復覩此天閑中毛為銀絲雪為質逸氣稜  
稜橫八極騰空駿足雲影翻夾鏡方瞳電光赤房精夜燭  
渥水湄矯然育此真龍媒同誇絕代得駿骨顧視萬馬皆



西明齋集卷一  
凡才奚官牽來玉墀側虬髯碧眼朱袍窄絨鞦碧鞵珊瑚  
鞭錦韉綠轡黃金勒吳興自是宗室親駉裏驂留嘗見真  
飛騰驚竦合變化顧爾覩素皆麒麟祗今披圖畫堂裡便  
覺長鳴朔風起安得真持獻紫宸參駕龍駟奉丹宸

元夕賜觀燈詩三首

河漢沉沉霽景澄蓬萊燃滿九華燈青猊白象三千界綺  
閣雕闌十二層花繡芙蓉濃艷吐簾垂翡翠異香凝世人  
惟向雲中見遙望天門不可登

樂奏韶咸寶扇開遙瞻龍馭自天來九門香逐靈飈度萬  
國春隨御氣回彩鳳高臨青玉案彤雲輕護紫霞杯臣民  
共願宸遊樂海內歡聲溢九垓

中使傳宣宴百官珮聲遙集五雲端酒傾綠蟻開金甕  
餽蒼麟奉玉盤寶帳春回頻送暖瑤臺雪霽不生寒侍臣  
霑醉蒙恩德更勅都人近御看

題五馬浴川圖

翩翩天廐五龍媒太液池中浴未回身散玉花雲影動日  
流星彩鏡光開負圖似向滎河出孕質疑從渥水來明日  
彤墀齊立仗總承恩澤下蓬萊

白蓮

太液澄波濯素容玉衣照影水晶宮月明無處尋顏色只  
信香飄十里風

謝瑾字廷蘭鄞人永樂四年進士歷廣西廉使



瓊花觀

廣陵帝子泣嬪虞絃斷南薰鳳影孤  
暗灑淚痕斑翠竹青  
來魂氣隔蒼梧秋風衡岳沉鴻鴈  
暮雨湘江怨鷓鴣明月  
三千年後夜九疑雲冷夢應踈

周冕

字汝服號訥庵鄞人永樂六年由薦辟任春坊司

雙鳩圖

枝頭拂羽弄朝陰時送鳴聲出遠林  
對立東風春意早一  
簾踈雨畫堂深

題宣和喜鵲

曾向銀河濯羽毛親承天澤下層霄  
萬年枝上棲偏穩五  
鳳樓前意自嬌銜喜靜憐春晝語  
弄晴輕颺晚風飄畫圖

留得宣和筆回首當年已寂寥

黃潤玉

字孟清鄞人永樂十八年舉人廣西提學僉事

清逸軒為處州洪處士賦

水光山色淨無埃山下幽軒傍水開  
竹鎖芸窓塵不到苔  
封花徑客稀來茶烹石鼎龍涎息  
暮落楸枰鶴夢回獨愧  
清風明月夜一尊誰繼謫仙才

陸瑜 字廷玉宣德八年進士刑部尚書

送杜廷言致仕歸山歌

秋風飄飄吹客衣玉河橋畔故人歸  
離多會少情難別悵  
望天南鴻鴈飛憶昔與君皆年少  
同采芹香托同調宦途  
先後如鴈飛雲樹微茫耿心照  
三十餘年夢寐過君鬢尚



黑余已瞞塵羈未脫歸未得鄉思如渴當如何君才卓犖  
富詞藻相逢一笑即傾倒騏驎只擬遊天衢鯨魚那堪育  
池沼方今大廈用棟梁挽君不住空斷腸粟里怡然五柳  
宅關西拋却三鱸堂人生有子萬事足青瑣賢郎美冰玉  
河橋搔首盼停雲早捧鑾封分釜粟

### 遊雲門寺

雲門杳杳白雲間石磴重重不可攀河影倒流回北斗朝  
光初動見南山一匡起霸遺封在四載分州此地還乘輿  
遠來登絕頂望中三島隔塵寰

周序

字文彛號味墨鄞人

正統中任寧波府學司訓由

### 野田行

萋萋芳草白楊路落日平原聚狐兔斷碑蝕土已無文  
人言是將軍墓將軍未死竭忠良將軍既死多感傷萬年  
千載一坏土事殊勢異今荒涼子孫遠矣人莫識亦有栽  
桑與栽麥雍門引琴為誰悲能不歎歎陳迹

### 起夜來

迢迢中夜長明月流素光如何不能寐徘徊坐惆悵四望  
聞無人對影臨空牀忽聞孤鴈征零淚沾衣裳涼風亦蕭  
蕭露下凝為霜思君既不來箠笈守閨房

### 王昭君

朱顏今日誤清淚幾時乾衣袖塵沙滿羶房雨雪寒天遙  
悲絕塞月近望長安空抱淒涼恨琵琶馬上彈



錢塘懷古

南渡興王日偏安勢已窮兩宮驅塞北萬騎轉江東相國  
專和議將軍誓死忠迢迢湖上路芳草夕陽中

拜新月

月圓花正開月缺花已老韶光去莫留繁華豈長保人生  
苦離別夜夜望新月女兒下階拜愛圓不愛缺

宮怨

羅幌動微風沉沉永巷中鳥啼朱戶掩花謝玉闌空妾意  
春長在君恩水自東獨悲明月夜歌吹動深宮

月夜憶鄭維乾

門前湖水清坐愛月臨城月在不能寐水流空復情芳

寒露重衰草候蟲鳴斷絕淒涼夜深慚夢未成

賦得輕霞映瑣闥贈友人

雙闕迢迢拂曙輝漸看一縷動金扉光分瑞日明仙仗色  
借春雲上御衣還傍宮花紛燦爛更隨香靄轉依微懸知  
朝罷重回首杳杳天長鷺與飛

洪常

字子經號

鄞人正統十三年進士歷職方郎

懷鄭汝誠

端居鬱無聊引領懷三益相違念一朝况茲歲屢易雲樹  
渺關河之情安所適歡娛日以疎憂愁日以積緘題寄便  
鴻相期崇令德

黃性

字自誠號網菴鄞人司訓



送所知

明星耿耿沒以稀  
晨雞再鳴河漢移  
披衣起視興遐思  
僕夫嚴裝欲南歸  
古墓新阡鬱纍纍  
歲久曠然增悽悽  
其持觴送子臨路歧  
情深惻愴不能違  
玄雲黯黯烏鵲飛

輓鄭二叅政阜義

二十起文章分符拜省郎  
承恩辭北闕持節向南荒  
旅櫬歸黃壤湖風慘白楊  
遙憐南海月空照紫微堂

鄭自強字

號

鄞人貢士

留別章二珎

祖道大江西春風黃鳥啼  
石危山路轉地險海城低  
浦樹夕陽盡人家陰霧迷  
孤舟今夜泊回首復淒淒

李本

字孝謙號中林鄞人隱士

春日雜興

世途何險巇疇能兩心托  
囚楚竟懷沙美新亦投閣  
所以巢許流韜光在巖壑  
麋鹿為伍隣烟霞恣談譎  
富貴等浮雲俯仰無愧怍  
我我富春山清風灑寥廓

題畫

青天際遠水落日明遙岑  
奮袖拂蒼石憇此長松陰  
涼飈灑露頂正可絃吾琴  
古調詎自祕坐惜寡知音  
美人隔秋水望望烟波深  
何當一晤語曠焉諧素心

里人獲蒼鹿異之獻于官遂作南山鹿

南山鹿山頭有草林有木  
朝朝出遊暮歸宿文毛爛斑聯



錦錢岐角嶙峋拔青玉白日饑含洞口花清泉渴飲岩邊  
谷胡為失脚踏塵埃也逐牛羊食人粟牧兒驚見兩角羸  
傳呼兩兩三三續折木為兵石為砲踰溝越隴相馳逐一  
蹶倉皇折雙足持獻長官脯其肉吻吻不向嘉賓鳴濯濯  
已辭靈囿伏只念深山學仙客誰與牽車下山麓烏乎汝  
鹿最有山林情汝乃何故喪其生寄言雲中猿鶴友莫向  
人間借路行

送季温内兄從軍

四月五月南風狂大麥小麥相亞黃吳蠶成繭不及縑慈  
母又縫遊子裳遊子從軍上京國賣犢粧刀助行色西亭  
出祖柳正長駿馬驕嘶羈不得丈夫孤矢志四方豈效兒

女戀故鄉酒酣慷慨拔劍舞青天白日飛秋霜聖皇開邊  
固無戰地盡西南置州縣獨憐殘胡喘息存深窟窮荒淫  
兇悍君今名隸行伍中不用自誇兩石弓胸中籌畫足制  
勝好坐帷幄參元戎馬銜山前刁斗月龍捲河上旌旗風  
我武維揚號令肅呼邪日逐爭來降凱歌入奏明光宮從  
此朔南聲教同大開明堂議東封君則長揖辭成功歸來  
聽我擊壤歌年豐

四蟲言

予觀梅蘇諸老禽言皆無定名特以聲之近似因  
寓意焉爾郊居玩物得羽鳴者四亦若有謂然遂  
作蟲言云



翁翁復翁翁汝傳誰與同此翁不解世間事世間賤老少  
為貴恨不鑷白還蒼童何用自口稱翁翁蜂

遮了遮了主人屋破忙不補只愁秋來長苦雨南崗黃茅  
亦易求何不剪取遮牀頭城中盡是樓上樓誰念中宵沾  
濕愁蟬

快織快織兩日催成絹一疋嚴霜凍栢風斷絲不辭深夜  
了殘機便從燈下試刀尺寄到邊城猶恠遲促織

類我類我休忘字外聽我教誨勤願爾假作真恩同骨肉  
長相親莫學人家不肖子少時父母長路人螺贏

孤鴈篇

秋高八月風力狂吹斷長空征鴈行分飛漢月片影隻

入楚雲幽然長獨夜愁迷荻浦雨五更夢斷蘆田霜枯吻  
連朝不飲啄側身萬里遙相望相望萬里關塞隔却憶平  
生長作客隨陽未飽稻梁謀遵渚常虞網羅厄薊北江南  
三五群秋涼春燠往來頻曾將帛書報邊使更聯箏柱親  
佳人誰知中道兩相失漂泊天涯歸未得開口敢出號天  
聲畏人且塌搏風翼錦水鴛鴦相並棲畫梁燕子雙將雛  
誰憐獨有孤飛鴈歲歲江湖別離歎

山居為柯定安

四百青山障俗氛數家雞犬自相聞茆簷低礙岩前石木  
榻高棲雨後雲晚徑樵歸憑鹿引秋林果熟與猿分從來  
懶入桃源市自釀松花日半醺



遊天童寺

青春廿里萬松關，小白前瞻太白山。  
度嶺路迷黃葉裡，隔谿人語白雲間。  
海龍護法聽金磬，野鹿參禪獻玉環。  
老衲相留成信宿，浮生贏得此偷閒。

題畫馬

晚向天門立仗歸，驕嘶誰與脫金鞵。  
鑿與近日希巡幸，閒放春堤首著肥。

題松鶴

長松風入漱雲濤，老鶴離巢刷羽毛。  
夜半道人騎過海，一輪秋月碧天高。

題宋徽宗畫竹

宣和殿下碧琅玕，月影風聲豈奈寒。  
一自江南栽老檜，將消息報平安。

經屠氏廢宅

桃源處士今何處，花落東風尚未歸。  
舊業盡隨芳草沒，遊魂暗逐斷蓬飛。  
月臺鳳去瓊簫咽，烟水魚沉錦字稀。  
惟有畫橋橋畔柳，春來依舊綠依依。

月湖夜泊

卧聽鐘鼓隱層城，一枕烟波月二更。  
歸夢不知鄉樹遠，浮蹤暗逐浪花輕。  
雲埋丞相藏春塢，星落將軍種柳營。  
盡道此中陳迹易，雞鳴還有馬蹄聲。

題画



溪頭春水碧粼粼  
溪上春山絕點塵  
不信白雲都占盡  
也應茆屋有閒人

李悌謙孝謙弟鄞人隱士

### 東門行

朝入東門城試作東門行  
東門小吏打道開馬前  
高喝將軍來將軍馬上錦繡袍  
妙年三十纔向高自信  
勲勞邁頗牧常將意氣凌  
蕭曹紫騮一疋天子賜新鞞  
金鞍搖玉轡腰下長懸兩石弓  
腹中豈貯三千字清時校獵城南隅  
旌旗蔽野人塞塗一時蒼黃爪牙奮  
百里飛走影響無歸來升堂設綺席  
列坐擊鼓吹笙竽金鳳釵橫翠翹起  
嬌娥雙顏色都藏鬪呼取銀錯落按節  
舞蹈紅氍毹蠟炬高

白于晝樂事已徧清夜徂君不見窮巷書生讀書苦  
一生身被儒冠誤不思學劍求出身閉門猶擬長楊賦

### 擬古二首

驅車送君行送君長亭道落日照道周君行何草草  
結交既已晚相去一何早世路多險巇君身詎能保  
別時春草深于今已枯槁思君衣帶緩憶君容易老  
願為雙鴻鳥翻飛入穹昊

盈盈樓上女皎皎揚青眉向天掩淚啼恨深人莫知  
我本良家子誤適商人兒商人但趨利不識生別離  
前年販茶去海角復天涯今年未有書歸期復何如

王淮

字栢源號

慈谿人隱士



西風雅卷一  
中秋懷吳廷珪

秋滿瑤臺夜未央美人何處醉傳觴  
烟霞城郭山光霽風月樓臺水氣涼  
簾捲桂花香滿席屏開梧葉影侵牀  
紫簫吹斷霓裳曲鶴在遙林夢正長

清樂軒

無心涉是非水屋掩柴扉俯檻池魚躍  
開門野鷺飛松花釀臘酒荷葉補秋衣  
向晚看山去孤筇步落暉

田家

流水遶柴門門前小徑分棘籬喧鳥雀  
桑墅散雞豚午竈黃梁熟春缸白酒渾  
田翁無少事閒坐弄諸孫

元夜

風雪今宵盡鰲山月似銀笙簫幾家醉  
燈火六街春暖逐歌臺響香霏步輦塵  
繁華隨處滿誰念獨吟人

雪中懷故人

丘壑誰為伴相携獨有君出門深雨雪  
極目限江雲白髮空年邁青燈坐夜分  
歲闌相憶夢只在剡溪濱

元宵踏歌

梅花雪洗香塵陌柳淡官橋春一色  
家家對月賞元宵火樹鰲山高百尺  
九街簫鼓沸春聲燈下女郎連袂行  
唱盡開元太平曲月輪已過西樓楹

桃源行

武陵十里桃花水遙接仙家洞天裡  
桃花不隱洞中春引



得漁郎來問津洞中墻屋開村落石井沙田是畊鑿陰連  
綠樹晝昏昏鳴雞吠犬東西門漁郎相見驚相語共問今  
朝是誰主秦家虐燄逐飛烟司馬獨主江南天尊前論罷  
長歎息醉掩松窓卧苔石明朝出洞歸故鄉回首萬壑雲  
茫茫山中此景知無有千載詞人說盈口我欲携書上釣  
船洞口去覓桃花源

秦女吹簫曲

翠鬟二八秦宮女學得吹簫作鸞語芙蓉暖帳護春香十  
二樓頭弄雲雨簫聲飄飄度彩霞好風送上仙人家仙人  
特遣雙鳳下載入秦宮看桂華桂華零落秦宮冷十二樓  
頭空月影寒蛩夜夜斷人腸雙鳳下來雲路長

潘瑛字

號

鄞人司訓

賦得亂山殘雪夜送張大

海天臘盡凍雲飄馬度千山雪未消望入三秦邊地迥夢  
迴百粵故鄉遙衝寒貫酒過豐市乘月吟詩上灞橋明到  
親闈多勝事客懷無復此蕭條

賦得蒼茫歲暮天送張二應麟

萬山搖落思漫漫河水流澌臘月寒越嶠孤雲連祖帳秦  
川飛雪擁征鞍含春弱柳臨岐折報暖踈梅夾道看遙想  
關中天不遠葱葱佳氣共承歡

王來

字元之號

慈谿人宣德中貢士仕終工部尚

平蠻班師



四明風雅卷一  
一片丹心兩鬢皤平蠻事業仗天戈才非王佐慚諸葛老  
得邊功似伏波綠野有堂情可適赤松無約夢偏多從來  
忠孝難兼盡日暮頻興陟屺歌

王總

字文耀號

慈谿人寺副

送人下第

且醉尊前麩米春不須臨別歎風塵眼前無限青雲客半  
是當年失意人

章珎

字文重號

鄞人隱士

良人

良人越河關歲月忽已久灼灼庭中花苑彼庭前柳春陽  
被萬物芳草亦合歡如何遠別離長江路漫漫漫漫江河

長迢遞不可逾相思發長歎視我明月珠

贈所知效陶體

我我青山下小屋十餘間禾黍滿東臯桑麻翳後園日出  
讀我書日入高枕眠相知無心曲惟此門前山好鳥歸深  
林白雲宿層巔陶然得真趣悠悠樂吾年

艷歌行

和風散晴靄冷露晞春陽步出閨中姝采掇陌上桑冶容  
事窈窕穠艷飄芬芳髻擁黃金釵耳垂明月璫湘綺以為  
衣紫羅以為裳使君愛青年下馬揖紅粧為言孤鳳鳥欲  
效雙鴛鴦妾身名家女夫婿侍中郎豪氣萬人上美軀七  
尺長朱門白玉堦錦鞍青絲韉爾今在長坂妻亦守空房



游俠恐相繼能忍容為娼

懷張二環

別後令人憶舊歡  
盡簪林下恣盤桓  
西風黃菊籬邊坐  
落日青山屋裡看  
鳥下閒庭秋草綠  
猿啼孤館曙鐘寒  
所思只在溪南路  
尊酒論文會獨難

擬唐陳伯玉度荆門望楚

亂峯前路迥旅况正紛紛  
落日荆門望青山  
楚國分孤城連郢樹  
獨棹入蠻雲誰念天涯客  
西風見鴈群

擬曉發五溪

舟發川中路孤吟背夕曛  
秋聲巫峽水暝色夜郎雲  
野店青山繞溪橋綠樹分  
採菱歌棹遠風靜有時聞

夜宿武陵南山懷張鳴玉

越客夜向山中宿風動竹枝鳴  
佩玉攬衣起坐不見人  
江上月明江水綠

題鄭汝誠所藏山水圖

南山春雨晴西溪春水滿  
孤舟釣夕陽沙明綠蒲短

無題

溪橋春水綠新蒲綠堪把  
茆屋掩松雲斜陽鳥飛下

劉生

不事魯儒文談兵動主君  
開弓學明月射鴈落黃雲  
桃葉迷歌扇榴花醉舞裙  
遨遊五陵地結納李將軍

張憬字景心號

勤人隱士



挽宋龍州先生

慄慄北風勁百草腓且僵白日失中舍滲淡寒無光漫漫  
愁思多激烈歌聲長浮雲結重陰俛仰內自傷揮劍出長  
坂我馬玄以黃川流移東溟葵藿傾太陽端居顧安適誰  
能履周行崔崔玉山岡孤墳鬱鬱蒼蒼猗猗蕙蘭花千古含  
芬芳

秋日宴海昌硤石東山

東山此日會儒英霜落天高秋氣清風度鐘聲諸刹近雲  
開日色兩峯晴葛洪井上烟霞古顧况臺前草樹平臨眺  
不須論往事故鄉回首獨含情

聽鶯曲

嘿坐湘簾垂啼鶯在高枝初啼君已去再啼君不知

詹復禮字

號

鄞人隱士

賦得鬱鬱園中柳送行人

鬱鬱園中柳芳姿藹晴曦春風動微和零落多華滋皎皎  
揚素花濯濯垂繁枝同袍戒嚴裝奄忽與我違焉知遠行  
邁欲好不終期攀條聊以贈悠悠起遐思

妾安所居

憶昔初嫁時人言妾有家修眉橫遠山芳姿玉無瑕燕婉  
誓偕老合歡良莫加胡為輕別離各在天一涯昔為珠與  
玉今為泥與沙免絲倚蓬草離離顏色好小物若無情生  
榮死同槁君心不可知妾心無改移中途歸無廬惻惻安



所居

雨雪曲

胡天九月先雪飛旌旗慘淡無光輝沙場萬里杳無際黃雲不動西風悲軍容肅肅壯前驅寒威凜凜生鏤衣君恩未報敢忘死羯胡滅盡終當歸

結交行

褒斜路不容憶艷瀕水能覆舟人心之危過於此恩讐友掌君知否憶昔結交如弟兄酒邊歡洽肝膽傾一言不合遂嫌隙坐看平地風波生道路相見不相識胸中徃徃藏甲兵所以古人交難合不易離管鮑分財范張黍雞千載之下誰以之

行路難

君不見陌上草秋風忽至皆枯槁君不見天上月團圓幾時還又缺青年夫婿事遠征蛾眉長怨多離別他日歸來看白髮

嚴貞

永樂戊戌進士奉化人仕終雲南布政

和柳子厚登柳州城樓

獨上城樓望海天異鄉愁思正茫然溪雲暝帶桄榔雨野日晴消薜荔烟百越河山通嶺徼半江菰米熟秋田舊遊別後多零落日斷滄波只自憐

汪綸

號師古景泰中鄉薦任南豐分教鄞人

丹霞洞



溪上栽桃滿洞花，洞門石壁掩丹霞。  
茫茫流水空仙迹，寂寂青山自歲華。  
古木垂蘿還拂地，野猿生子亦成家。  
乾坤已入昇平久，莫為秦人理釣槎。

余謚字

號

鄞人隱士

### 送袁從事

西風送客大江邊，興盡離杯涕管絃。  
許國共懷蕭相業，乘時獨羨祖生鞭。  
三秋驛路青山外，萬國關河白鴈前。  
此去功名須努力，高堂華髮待流年。

### 分詠華山送張伯仁之陝

太岳崢嶸仰萬山，憐君此去重躋攀。  
烟霞長繞三峯外，日月平臨一掌間。  
沙塞北來連漢時，河流東去帶秦關。  
洞中

若有希夷在，為我慇懃問大還。

### 賦得金羈絡駿馬送周司務出使還京

君王舊賜五花驄，金絡銀鞍氣象雄。  
霧鬣飛揚開大道，霜蹄騰踏起長風。  
九霄紅日天顏近，萬里青雲輦路通。  
四牧歌闌恩賜後，玉珂明月下南宮。

### 大聖樂

聖皇御極開太平，兩階樂奏中和聲。  
拊然擊石誕文明，玉戚朱干昭武成。  
九歌九德咸休徵，百獸率舞殷神靈。  
盛時制作需股肱，后夔佇待鈞天庭。

范瀚

鄞人天順七年歲貢知縣

### 紫騮馬



綠楊陌上嘶紫騮青絲絡首紅絨鞦竹批雙耳迎風竣鏤  
踏四蹄驚電流有客朝天控金勒錦衣玉佩神仙傳春風  
蹀躞日千里五雲深處承殊休

桂廷珪 慈谿人天順六年鄉貢士

綠水曲

天津茫茫接南北蛟騰鼉舞不可測空青倒影涵素光汀  
草含滋映春色月明神女弄珠遊風細鮫人斷綃織棹歌  
一曲聞漸遙萬里相思流不極

李澤 字

千里思

長安一去五千里思心日夜如流水寂寂鱗鴻絕海涯依

依桑梓斜陽裡隔葉啼鶯不可聽閒門芳草空復情人生  
出處古來有南北相思同月明

李玉 字 鄞人

一尊酒

野館春醲酒初熟新豐蟻子盈尊綠故人別去千里遙誰  
共尊前頻席促金盃分來琥珀光玉杯瀉出醍醐香悠然  
獨酌不成醉花落閒庭春晝長

王節 字孟禮號墨莊鄞人深寧尚書七世孫隱士

夜坐吟

銀河倒影夜未央踈星瞥瞥風露涼平林月皎碧窓靜繞  
簷烏鵲飛且鳴叶推屏展轉不能寐攬衣起坐熱中腸萬



里人行向何處駕言載簡觀明光

武陵桃源圖


仙境悠然隔世塵此中俱是避秦人  
兒孫不識君臣禮風俗還知父子親  
兩岸落花飛片片半溪新水漲粼粼  
劉郎一去無消息更有何人解問津

齊政字  鄆人

明月篇

明月團團東海生星移河淺風露零  
瑤臺亭亭金鏡滿乳泉淡淡玉壺清  
壺有裂鏡有缺君心一片長如月若為南  
北照離愁三五光輝偏皎潔

裘鏞字

 慈谿人

夜坐吟

良夜沉沉坐虛堂美人遙隔天一方  
金缸耿耿任明滅玉漏沉沉忘短長  
倬彼星河對庭戶淒其風露侵衣裳  
此時懸想候雙闕龍樓鷄唱趨鷓行

袁士元

字彥章號

 鄆人官翰林

題大瀛海道院

十二樓臺十二闌一聲鐺笛碧雲間  
龍吟海口秋濤壯鶴立溪頭春晝閒  
丹井水寒桐影落棋盤石老蘚痕斑  
眼前歷歷皆陳迹知有仙人幾往還

葡萄月

清光到處已瀟灑偏向葡萄更可憐  
萬顆明珠初浥露一



西明廬雅卷一  
六  
輪寶鑑正當天蒼龍夜靜掀髯舞玉兔秋深抱影眠最好  
今宵涼似水不妨呼酒醉庭前

金湜

字本清號湖林鄞人鄉進士歷中書舍人太僕寺丞

題唐明皇吹玉簫圖

昭陽殿高清晝長珊瑚枕壓七寶牀珍簾平鋪碧雲冷珠  
簾半捲秋風涼此時諫疏非無補君王自喜教歌舞舊曲  
翻成阿濫堆別調新傳玉簫譜玉簫一曲度薰風宮商十  
指何玲瓏碧沼游魚窺菡萏丹青彩鳳鳴梧桐梨園弟子  
多白髮承宣獨喜王番綽手提玉板不停敲足踏青蒲恣  
歡謔雙雙粉黛誰家女霓裳細拂鮫綃縷斂袖低眉不動  
塵似解嗚嗚曲中語從來聲色移人心人生樂極悲亦深

豈料簫聲入雲去化作漁陽鼙鼓音

河間府瀛海驛寫竹溪成長句

我本東南瀛海客乘興來登瀛海堂堂中開簾分廣席四  
壁拂拭如秋霜老夫見此發長嘯便覺清風滿穹昊呼童  
捉筆破水墨胸中恍惚窺天造何須巧作鐵鈎鎖何須苦  
效金錯刀大竿小挺恣揮灑千枝萬葉分秋毫何須坐對  
湘江雨何須去踏淇園春清泉白石漱寒玉琅玕翡翠排  
青雲雲氣淋漓墨猶濕隔牕似聽湘娥泣兔起鶻落魑魅  
愁一夜轟雷破春蟄蟄龍振起風怒號蒼烟翠霧翻波濤  
鯨鯢帶雨走平陸鼃鼃跋浪聲嗷嗷從來造化不可測呼  
吸陰陽在頃刻篔簹谷口冥烟開白日龍來作人立黃堂



西明廬升卷一  
太守人中英愍勤置酒當前庭大觥小觥迭相舉賓僚進  
退如諸生我亦平生好奇絕為作長歌歌一闋樓頭羌管  
落天風筆底驚蛇走冰雪歌罷出門呼驛吏叮嚀牕戶須  
常閉只恐天工有使來一朝捲入空中去

文華殿入直

祕殿深沉鳳閣東中官催召寵恩隆露分仙掌薔薇綠酒  
賜宮壺琥珀紅只尺龍顏呈日表從容天語出淵衷侍臣  
才調皆班馬獨愧抽毫賦未工

登多景樓

滾滾江流動地來重重樓閣倚天開行當草罷平胡詔乞  
取青山作釣臺

周普

字德施號守拙鄞人隱士司訓周序之子

秋思

露下蘭無香風高葉初墮空庭不見人落月照孤坐

懷友

故人別去一春深地北天南魚雁沉夢逐蝶魂迷草色愁  
憑鶯語訴花陰風回別徑暮三落烟鎖閒門柳十尋獨有  
離懷禁不得倚闌長對碧雲吟

翁洲王仲禮水竹居

新構華軒俯碧流萬竿修竹共清幽濃陰覆處開碁局疎  
雨晴時引釣舟隱隱月明湘浦夜蕭蕭風起渭川秋于今  
聖代無遺逸未許林泉到白頭



周元佐字世良號介石歎入成化丙午舉人汀州府推

步月尋梅

有客尋梅步月華不知春信到誰家携琴踏遍孤山路曳  
杖吟餘越水涯風細漸分香遠近雪晴忽見影橫斜相看  
莫把群芳並自是江南第一花

周祐字號成化中由薦辟授本府陰陽正術

送金子還滇南戍所

西風把酒贈驪歌駐馬含愁意若何書劔又從關外去年  
華半是客中過楚江樹色經寒早巫峽猿聲向晚多到日  
轅門應有問為言東海靖無波

鄭惟廣字汝誠號蘭谷鄞人致君

五更轉咏促織鳴東壁送友人

一更風露清東壁寒蛩鳴所懷離別人獨坐傷我情  
二更人愈愁聲聲近牀頭昨日携手好今夕在他州  
三更月正圓促織爾何然欲夢見容顏展轉不得眠  
四更更漏遲唧唧鳴聲悲含情不可聽復起坐孤幃  
五更聲欲殘霜落空林寒其如遠人何相思路漫漫

行路難

君不見江上山峩峩絕頂人莫攀又不見門前水日夜東  
流何時已隣家少婦長歎息青鸞日掩心相憶春來花鳥  
每關情夫婿年年為軍役

自君之去矣三首



自君之去矣日夜長相思思君如朝露湛湛能幾時  
自君之去矣春草迷江路思君如流水一別經幾度  
自君之去矣如鳥鳴芳樹思君如春花香色何時睹

靜夜思

中夜起徘徊天空月如洗為憶閨中人渺渺湘江水

南征詩成化二年同襄城李公征勦四川大壩蠻賊

九重命下靖邊陲萬里秋風汗馬肥劍氣橫空銷瘴霧日  
華絢彩動旌旂豺狼已遁深山迹虎旅先揚上國威功紀  
太常應有日都人遙聽凱歌歸

王鏞字

慈谿人御史

次送鄭惟廣南征

遠將王命出南陲寶劍橫秋戰馬肥月冷金戈悲鼓角風  
生玉帳動幡旂熊師未用劉侯策燧道先驚馬援威指日  
功成書露布燕臺洗耳聽旋歸

戴浩

字彥廣號默庵鄞人永樂庚子鄉試歷官知府

述懷

昨日傷春獨倚樓今朝倚檻又悲秋桃花纔綻蒸霞爛楓  
葉隨飄逐水流明月清風惟我得膏腴沃壤屬人收佇看  
覆手須臾頃贏得虛名老白頭

咏春

九十春光似酒濃隔簾香暖小桃紅杖藜緩步尋芳草閒  
逐黃鸝過水東



咏秋

西風滿路桂花香  
吹徹天街似水涼  
獨坐南牕讀周易  
半輪明月照空梁

春曉聞鶯

東風微度栗留聲  
羌笛輕調百轉清  
喚起春光無覓處  
柳堤花塢霧冥冥

題風烟雪月梅

忽覩殘花滿玉臺  
恍如鱗甲印蒼苔  
也知搖落難留在一  
度春來一度開  
一抹輕烟撥不開  
朦朦淡淡鎖粧臺  
仙肌猶自無顏色  
何日添容傅粉腮

六花舞處五花開  
兩白交輝絕點埃  
花神不怕寒侵骨  
能佔江南百卉魁  
一輪明月照長安  
萬斛珠璣鏡裡看  
莫道我家無好處  
一簾清氣滿闌干

戴粟

字敬之號純齋鄞人正統辛酉舉人江西安福知縣

桐川道中

向晚入桐川  
迢迢思惘然  
塵沙溪口路  
烟雨渡頭船  
野寺明還沒  
村家斷復連  
行囊詩卷重  
何處息吟肩

春夢

昨宵枕畔春風起  
夢魂吹入巫山裏  
覺來為憶巫山人  
牕外瀟瀟五更雨



洪性字復之號菊泉邠人隱士

擬古

青青岩畔松苑苑山上柏矯矯含貞姿交情固金石盈盈  
苑中花灼灼誇顏色翩翩游俠兒看花滿街陌紛紛艷綺  
羅輪蹄密如織高宴動歌鐘歡娛每終夕好花忽零落寂  
寞稀人迹顧崇歲寒節矢志終不易

寄翁彥雍

去年胡地慘相別杜鵑處處春芳歇今年西魯重相思客  
窓獨歎涼風發白雲回首重徘徊千里鄉關共明月驚寒  
夜唳南飛鴻溪山歸夢江湖中自憐囊橐黃金空欲歸未  
歸西復東五陵桃李爭光輝世人誰復重布衣撫琴試鼓  
陽春曲傷心客館知音稀窮轍遑遑故關杳王粲樓頭  
興浩孫陽已去方臯死騏驥鹽車上虞道

胡人出獵圖

白草秋高胡馬肥胡風捲地黃塵飛黃塵萬里暗金微胡  
天白日寒無輝單于號令急傳箭指揮部落連長圍旌旄  
列繞陰山側身騎駿馬交鳴鏑野獸成群時正饒擊狐射  
兔不遑息霜氣寒嚴弓力強發弦仰落雲中翼臂上蒼鷹  
初解縹勁秋六翮銛如刀鈎爪金眸意氣豪橫身縱擊搏  
空高桑乾水冷冰初合黃雲遍地層陰匝老上急徵左右  
王列騎寒郊相會獵貂鼠黃羊鞍畔懸反辣酥香滿柈榼  
昭君馬上彈琵琶聲聲哀怨空思家雙啼雨淚沾胡沙愁



聞處處吹胡笳羶毳往來依水草稚駒慣識居延道回頭  
北斗南方看牛酥馬酪塞門老中原昔日汗臙腥漠南近  
地皆龍庭只今聖代昭文明太平稀識犬羊形此圖相傳  
二百載趙君妙蹟今猶在羞聞紅粉去和戎披圖一見翻  
感慨

題靜閒房

松老真僧臘清居屋數間庭看芳草合門掩落花閒世事  
隨流水禪心對遠山有時飛錫去仍共白雲閒

賀文徵端陽有贈和答

吊屈年年競彩舟湘沅萬古逐臣愁梟羹近賜青雲客艾  
虎羞簪白髮頭趨俗暫纏長命縷怯寒未解黑貂裘懷君

逸興看雲樹落日蒼茫獨倚樓

此身漂泊似虛舟蒲酒難消底事愁已覺貴遊空滿眼羞  
看衰髮漸盈頭風塵處處馮驩缺湖海年年季子裘物候  
頻添離別恨幾番引領仲宣樓

龍岡夜月

龍崗崗上月華明桂影星河入望清玉宇瓊樓秋萬頃銀  
盤冰鑑夜三更色添庾亮登臨興光動袁宏嘯咏情回首  
姮娥天路遠乘槎直欲犯長庚

題蘭

楚苑光風暗轉魂江離從此怨王孫九歌不盡當時意還  
向瑤琴曲裡論



毛弘

字士廣號

鄆人天順元年進士刑科都給事中

楊子寒潮送陳都閩文

渺渺來京口蒼茫接遠汀寒聲隨落月流影帶疎星楚樹遠村暝吳山隔岸清夜深泊舟處欹枕若為聽

為同寅劉敬之賦竹

半巖翠色冷房櫳一派簫聲度碧空鸞鳳不來湘水綠雙娥空自然東風

送鄭惟廣南征次韻

新從定遠靖南騁戰馬交嘶首著肥潮滿湘江喧鼓吹雲開劍閣擁牙旂坐謀自解韜鈴術草檄先揚節制威遙想營門看夜月鄉園明憶藁砧歸

薛穰

字有年號豫庵鄆人天順六年鄉貢知灤州

晚過楊子江

舟移京口暮潮生楓葉蘆花動客情千障雨收群鳥下一江風正片帆輕中流樹隱金山寺隔岸雲連鍊甕城東望鄉園倍惆悵誰家砧杵亂秋聲

張家灣望京

曙鴉衰柳度秋風路入京華四望通萬井人家三島外九重宮闕五雲中巖城盡是青山繞瑞靄偏從紫殿籠去去暫看天只尺日華又上鳳樓東

客中感懷

上林春雨杏花寒酌酒論心強自寬半世只從愁裡過二



毛羞向鏡中看獨憐骨肉分離久誰識君臣際遇難不是  
漢妃多薄命盡工何事誤毫端

和唐人玉臺體

雙魚沉且久雙鵲喧又飛憂喜總關心良人歸不歸

鳴皋歌

青田青鳥形神奇縞衣玄佩揚羽儀五夜遺音徹林壑九  
臯清唳聞天遶丹丘仙子朝元客憑虛願借雙飛翼蓬萊  
弱水三萬程一舉回頭天地窄

次征南韻

矢馬翩翩下蜀陲西風一路荳花肥角聲夜促銀壺箭劍  
氣晴連玉帳旂萬竈貔貅資將畧四郊狐鼠伏皇威凱歌

聲裡班師早麟閣勲名衆所歸

盧瑀

字希玉號益齋鄞人成化五年進士歷官都給事中廣平太守

宿新康江上感懷

夜宿新康古渡頭蘆花楓葉楚江秋十年宦况雲飛岫萬  
里鄉心月滿樓野燒隔林驚暮鳥漁郎鳴榜起沙鷗誰憐  
清夢鷓班繞不盡長沙賈傅愁

閨情

錦帳徹流蘇寒燈對影孤其如天上月千里照征夫

題梅

槎牙老榦勁如鍊萬點冰花燦晴雪瓊瑤為肌玉為骨一  
片粉牛雲寒浸月清光沉沉露華冷淡粧素服羅浮景翠鳥



啼落霜滿天酒罷歌闌夢初醒

題竹

幽人愛竹看不足更剪生綃寫雙玉  
蕭灑何如渭水姿扶疎彷彿淇園綠  
露葉參參鳳毛動烟梢漠漠春雲重  
竹根奇石一拳小共抱貞堅永相保

范麟

字文祥號

象山人隱士

城市山林

招提城市裡風景似深村芳草欲迷路  
白雲常到門閒堦留鳥跡古木上苔痕  
隔水繁華地從他車馬喧

皇朝四明風雅卷之一終



